

## **BERSELISIH FAHAM JANGAN SAMPAI PUTUS SAUDARA**

Oleh: Nayli Ulfah binti Jaffar, 1171758,

Fakulti Kepimpinan dan Pengurusan (FKP), Universiti Sains Islam Malaysia (USIM)

*Disiarkan pada 21 Ogos 2020*



Kerap berlaku dalam masyarakat ketika ini, perihal keluarga yang bermasam muka, bergaduh dan bertikam lidah sehingga membawa ke mahkamah.

Ada juga yang bertahun-tahun tidak bertegur sapa, membawa diri dan tidak kembali. Namun, tidak semua masalah yang dihadapi oleh sebuah keluarga berakhir dengan permusuhan sesama sendiri.

Air yang dicincang tidak akan putus. Begitulah istimewanya hubungan adik beradik walaupun terjadi perbalahan atau perselisihan faham antara mereka.

Saya yang mempunyai bilangan adik beradik yang ramai juga tidak terkecuali mengalami perselisihan faham antara abang, kakak dan adik beradik yang lain sehingga bermasam muka dan tidak bertegur sapa.

Namun, keakraban hubungan biologi kami menyebabkan pergaduhan tidak berpanjangan.



Perunding Kanan (Pendidikan & Keibubapaan) Ikhwah Training & Resources, Nur Firdaus Abdul Razak berkata, berkelahi atau bergaduh merupakan satu perkara yang lumrah yang bergantung kepada usia dan corak pemikiran seseorang.

Selain itu, Pensyarah dan Pakar Psikiatri Universiti Islam Antarabangsa Malaysia, Dr Rozanizam Zakaria mengatakan, perbalahan yang biasa terjadi adalah disebabkan naluri semula jadi yang berbeza.

Menurut beliau lagi setiap anak yang dilahirkan mempunyai sifat yang unik dan berbeza seperti pemalu, pendiam dan petah.

Apabila berlaku pergaduhan antara adik beradik, ia menyebabkan hilangnya satu rahmat Allah SWT dalam keluarga itu.

Perkara ini telah disebut dalam firman-Nya yang bermaksud, “Orang beriman itu sesungguhnya bersaudara. Sebab itu damaikanlah (perbaikilah hubungan) antara kedua saudaramu itu dan takutlah terhadap Allah SWT, supaya kamu mendapat rahmat.” (Surah al-Hujurat, ayat 10)

Jika dikaji, banyak isu yang sering terjadi antara adik beradik adalah disebabkan perasaan iri hati apabila timbul perasaan tidak puas hati dengan tingkah laku, kebaikan dan kejayaan adik beradik yang lain.

Nabi Muhammad SAW bersabda dalam sebuah hadis yang bermaksud, “Perasaan hasad dengki memakan pahala amalan seperti mana api memakan kayu.”

Sehubungan itu, kita perlu berlapang dada dan bergembira dengan kelebihan yang dimiliki adik beradik yang lain.

Bagi yang sudah berjaya, janganlah sombong dan bantulah adik beradik yang dalam kesusahan.

Perselisihan faham dalam adik beradik kini menjadi suatu adat dan perkara biasa dalam sesebuah keluarga.

Bila sudah bermasam muka dan tidak bertegur sapa, adalah sukar untuk berbaik-baik semula.

Konflik, pertengkaran dan pergaduhan sering terjadi dalam kalangan adik beradik tetapi disebabkan hubungan yang terjalin antara satu sama lain membantu terlerainya dendam dan iri hati, serta mewujudkan keharmonian dalam keluarga.

Tambahan pula, menjaga keharmonian keluarga adalah sangat penting dan dituntut oleh agama.

Walaupun besar masalah yang melanda, jangan diputuskan hubungan darah sesama ahli keluarga.